

98-84332-3

Dark, John Noel

An permittendum sit
mulieribus jus suffragii?

Oxford

1908

98-84332-3

MASTER NEGATIVE #

COLUMBIA UNIVERSITY LIBRARIES
PRESERVATION DIVISION

BIBLIOGRAPHIC MICROFORM TARGET

ORIGINAL MATERIAL AS FILMED - EXISTING BIBLIOGRAPHIC RECORD

396.3
Z3 Dark, John Noel
v.3 An permittendum sit mulieribus jus suffragii?
The Chancellor's Latin essay, 1908, scripsit John
Noel Dark... Oxford, Blackwell, 1908.
17 p. 21 $\frac{1}{2}$ cm in 23 $\frac{1}{2}$ cm.
Volume of pamphlets

87963

Only Ed

RESTRICTIONS ON USE: Reproductions may not be made without permission from Columbia University Libraries.

TECHNICAL MICROFORM DATA

FILM SIZE: 35mmREDUCTION RATIO: 11:1IMAGE PLACEMENT: IA (IIA) IB IIBDATE FILMED: 2-11-98INITIALS: PBTRACKING #: 30779

FILMED BY PRESERVATION RESOURCES, BETHLEHEM, PA.

396.3

23

#30

No. 30

AN PERMITTENDUM SIT MULIERIBUS
JUS SUFFRAGII?

THE CHANCELLOR'S LATIN ESSAY

1908

SCRIPSIT

JOHN NOEL DARK

COLLEGIUM DI. JO. BAPT. SCHOL.

Oxford

B. H. BLACKWELL, 50 & 51 BROAD STREET

London

SIMPKIN, MARSHALL, HAMILTON, KENT & CO.

—
MCMVIII

AN PERMITTENDUM SIT MULIERIBUS
JUS SUFFRAGII?

THE CHANCELLOR'S LATIN ESSAY
1908

SCRIPSIT
JOHN NOEL DARK
COLLEGII DI. JO. BAPT. SCHOL.

Oxford
B. H. BLACKWELL, 50 & 51 BROAD STREET
London
SIMPKIN, MARSHALL, HAMILTON, KENT & CO.
—
MCMVIII

Ἄνὴρ Συβαρίτης ἐξέπεσεν ἐξ ἄρματος,
καὶ πῶς κατέαγγε τῆς κεφαλῆς μέγα σφόδρα·
ἐτύχχανεν γὰρ οὐ τρίβον ὦν ἱππικῆς.
καίπειτ' ἐπιστάς εἶπε ἄνὴρ αὐτῷ φίλος·
ἔρδοι τις ἦν ἕκαστος εἰδείη τέχνην.

Arist. Vesp. 1427-1431.

AN PERMITTENDUM SIT MULIERIBUS JUS SUFFRAGII?

ARGUMENTUM.

CICERO Platonis et Aristotelis exemplo de re publica instituit dicere, ut si qua posset labantem jam Romanorum rempublicam consilio sustentare, nihil omisisse videretur. Sermonem igitur Africani Minoris ejusque familiarium sibi et amico cuidam, fortasse Attico, adulescentulis traditum fingit. In quo alia multa disserit Africanus, et eos, qui falsa et ementita libertatis spe mulierum animos deludunt, adversante Laelio increpat atque coarguit.

CETERA vero, inquit Africanus, quoniam per disputationes nostras satis perspeximus, hoc aliud incertum restat, quae ratio et norma vitae degendae mulieribus in republica designandae sint: quod ad illam bene constituendam moribusque justis ornandam maximum momentum habet. Venit autem mihi in mentem exordium quod omnium sermone hodie adeo jactatur atque percelebratur, ut, si nostra discretio inde nascatur, non in rebus nimium ignotis versemur: de suffragiis enim controversia apud et sapientes et vulgus indies percrebrescit, num mulieribus danda sint. Quam sententiam, precor, quasi praeses et propugnator defende, ut contra alterius opinionem vetere et Socratica ratione proelatus quaecunque ad feminarum officia, disciplinam, dignitatem spectant, quam commodissime disserere possim. Quid? si mihi rogantis partes suscepero, nonne respondebis?

Tum Laelius: Roga igitur; nam geram tibi morem, et id quod vis defendam, suffragia mulieribus danda esse.

S. Agedum, putasne ejusmodi esse jus suffragii ut solum dari possit? non datum multa nova et adhuc inusitata statim pariet?

Tum Laelius : Planius expone mihi id quod vis rogare ;
vix enim mihi manifestum est.

S. Nonne civis est unusquisque qui suffragia fert ?

L. Ita prorsus existimo.

Qui civium jure
fruiuntur eos
civium labores
respetti oportet.

Pertinent ergo, inquit, ad eum qui illo jure fruitur omnia
quae ad civem. Haud inter parietes focique tutelam ver-
satur civis ; sudat, laborat, fori fluctus, procellas contionum,
discordias, aerumnas, pericula sine fine solet exanclare :
onus immane haec, si in honores curiamque aspirat : haud
exiguum et ambitione carentibus. Quae ad perferenda
feminae nisi sint paratae, quid ista suffragia prosint ? An
scilicet plus curae in telarum pectinisque usu quam in
reipublicae muneribus fungendis usurpandum esse putas ?

Minime vero, inquit.

S. Ex his apparet matronas virginesque nostras isto
dono cives factas a dis Penatibus ac pace domestica, sicut
Ecclesiazusas illas ab Aristophane fictas, in officia neque
imperitis levia neque cum feminarum propria modestia
bene congruentia te eripere velle. Quod si tibi efficere
licuerit, nova gravitatis severitatisque persona assumpta,
mores, virtutes, omnes denique animi motus et affectus
mulieribus novare opus erit. Quanta et qualia sint ea
quae nunc in illis laudentur sed civibus quasi impedimenta
exuenda sint nondum perscrutari cupio, sed eo posthac
revertar ; verumtamen perspicuum est tabellis istis mulie-
ribus non tam unius juris discretionem quam cum mulie-
bris ingenii tum totius reipublicae formam et exemplar
commutatum iri. His repertis nonne liquet id quod dixi,
suffragia non sola dari posse, sed rebus novis esse repleta ?

Cives igitur nisi
feminae fieri
possunt, suffra-
gia a nihil pro-
stant.

Tum Laelius : Do vero res binas prius quidem ignotas,
nequaquam tamen ob eam causam respondens, primo
feminarum libertatem, deinde duplicem civium copiam
haec novi generis suffragia comparatura esse. Haud facile
tamen idcirco, nisi quae alia in mea sententia reprehenderis,
de suscepta causa me depelles.

Tum ille : At si non modo mulieres ab ea via et aperta
et ardua, quam tu, vir valde in verborum illecebris callide,
libertatem appelles, per ipsam naturam et ingenium abhor-
rere, sed etiam civitatem illis in consilia publica inmissis

non idcirco vires refectas, sed potius in parte intima gravis-
simo vulnere percussam damna et detrimenta capturam esse,
certis indicibus edocuero, nonne te de suffragii jure manifesto
in errore deprehensum esse fateberis ?

Fatebor, inquit ; at magnum id quod tibi proponis.

Experiar tamen, inquit Scipio ; et quoniam, ut dicis,
jam magna molior, praecepta ex antiquis precemur, et ex
Graecis praesertim, quod ex Latinis litteris nondum in has
latebras lumen allatum est. Jejuna tamen neque satis
perpensa praetermitto omnia ante Platonem de feminarum
statu proposita ; qui cum civitatem novis rebus multis in-
structam sibi finisset, mulieres etiam in libertatem uber-
rima sermonis arte sollertiaque vindicavit. Praestare
mares propter animi corporisque robur haud negavit ; sed
non nequire feminas rempublicam custodire ; una canes
utriusque sexus et vigilare et venari ; quamobrem nugari
eos qui nescioquo sexus discrimine altera alteris officia
discrere vellent. Palaestras igitur, mensas, bellum
ipsum feminis cum viris communicavit, ut in iis haud alia
studia moresque quam in maribus inveteracerent ; quae si
quis risu digna neque verecundiae virginali conventientia
duceret, tamen non ita pridem Cretes Lacedaemoniosque
primos Olympiae nudatos non modo barbaris sed etiam
Graecis ludibrio fuisse recordari jussit ; sapientis esse quod
prodesset pulchrum, turpe quod noceret habere. Nullam
praeterea rem familiarem, cujus gratia cives, abjecta omni
communitate, invidias inter se partiumque certamina con-
flarent, rempublicam illam ordinem concordia quasi nu-
merorum concentu temperatam conturbare passus est.
Haec denique nova de feminis statuit Plato ; quae si
neglexisset rempublicam cum factionibus domesticis quasi
morbo interiore quodam debilitatam tum dimidia civium
parte privatam inruente hoste externo mox esse dilapsuram
dixit. Nonne temere vel potius liberaliter videor Platonem,
philosophiae principem, tecum contra me consociare ?

Plato viris atque
feminis eandem
praescribit
disciplinam.

L. Immo vero prope praevaricatoris more causam
tuam prodidisse mihi videris.

Tum ille : Istius vero sententiae, cum in reges illos
(reges emin phylacas suos appellat), splendidissimum et

prope divinum ordinem, mulieres adsciscere Plato non dubitaret, praeclarum habes auctorem; sunt tamen quae mihi saltem non satis ille comprobavisse videatur; quae, nisi pertaesum est, velim dissere.

L. Expone tu ista crimina; nos ad audiendum parati sumus.

¶ tamen
¶ le: quod
¶ eque corporis
¶ imbecillitatem

Concedit igitur, inquit Africanus, ipse Plato in corpore muliebri minus esse roboris atque virium quam in maribus; quod ad confirmandum neque eloquentia neque documentis mihi opus est; omnium enim oculis apparet illas tantos et tam diuturnos labores quam mares nullo modo subire posse. Sed tamen ne ob eam quidem causam feminas et principum ordine excludendas, sed quantum valerent virorum socias et participes in disciplinam, bellum, rempublicam, fortunas denique omnes adducendas esse statuit; quod primum in controversiam voco. Quid? cum e canibus, bestiarum genere scilicet ignobili, usus et consuetudines ad homines educandos traducere cupiat, dubitas quin Plato, vir quidem summo ingenio et scientia, interdum tamen sicut Homerus possit dormire? Habet autem speciem quandam ratio illa, quod gregatim homines, sicut animalia nonnulla, societate conjuncti aetatem degunt; verumtamen ferarum multa reperiuntur genera quae magnum inter feminas maresque discrimen quaerentibus praebent. Quorum in numero cervos vigilare, pecus custodire, hostes vi et cornibus arcere, de imperio inter se dimicare, cervas autem ad bella vel cum maribus contentionem non satis duras sed nimium imbecillas esse quis ignorat? Haud aliter propter innatam corporis dissimilitudinem homines utriusque sexus studiis diversis sunt imbuti. Licet porro mihi, cum nunc ad hoc disceptandum occasio praeclara adsit, potentissimam rationis meae adjutricem naturam sumere, quae apud omnes tantum auctoritatis habet ut nemo sine metu contra eam contendere audeat. Nam cum in ipsa rerum natura lex quaedam fixa neque ullo hominum artificio evertenda insit, aliud esse generare, aliud parere, feminarum pars ea magna et summa laude digna quae pro partu laborare, dolere, omnia cum animo tum corpore vult perpeti nullo virili rerum externarum desiderio ardere

videtur. An vero ita delirat quisquam ut uxores nostras illis matrimonii laboribus defunctas ubi quasi in dubio talorum jactu spem, salutem, studia omnia collocaverint, ad rempublicam gerendam satis oti atque alacritatis habere opinetur? Primis tamen omnium feminarum nonne matronis, utpote quae et dignitate longe ceteris excellant et reipublicae plus prosint, ista suffragia, eximia sane merentium praemia, impertire mavis? Atqui minime omnium illae ipsae, non modo tenero et fragili corporis habitu, qui feminis cunctis communis est, sed etiam liberum partu cura impeditae, virorum opera partesque ultro occupare gestiunt. Quae cum ita sint, nisi tabellas istas et iis quibus dederis ridiculo fore cupis, non tam jure suffragii donare quam invitas necessitate devincire oportet.

Sed quoniam de viribus disputamus, tum plurimum cum ad arma bellicae casus res venerit virile robur ac nervos pollere recordemur; quae et magna ex parte fortitudinem irasque militares creare videntur et eadem feminis nisi perpaucis deficiunt. Nihil enim gloriam tam solidam et tam minime adumbratam habet quam pro patria dimicare et quam honestissime aut vincere aut occumbere: nihil dedecoris ignominiaeque tantum quam statione turpiter relictis in manifesta ignavia deprehendi. Civis tamen esse famam illam sive bonam sive malam, sed non feminae, inter omnes hominum gentes constat; quamobrem feminarum quaecunque bellandi studio superbiaeque flagrat, nonnunquam laudatur, saepius irridetur; quae sese timidam praebet, propter corporis infirmitatem non in culpam vocatur. Num decet igitur ejus oneris expertes quod civibus impositum est in civium consilia prodire? At idem illud tu, vir suffragiorum prodige, optas. At enim mulieres aliquot vel potius complures olim cum viris egregia virtute arma sumpserunt; quarum in numero Amazonas, bellicosum feminarum genus, quippe de quibus, fama per fabulas haud summa fide dignas ad nostra tempora perlata, nihil pro certo sciam, deasque in Graecorum litteris proelia identidem commisisse traditas, cum hanc in quaestionem res divinae nullo modo spectare videantur, haud invitus praeterrittam: sunt profecto quae non tanto temporum ac

locorum intervallo a nobis disjunctae sed majorum nostrorum memoria comprehensae summa fortitudinis exempla posteris ad imitandum reliquerint; e quibus nullas laude praeclariore quam Cloeliam et Lucretiam, civitatis nostrae decora atque ornamenta, dignas esse censeo. Hoc vero aliquid rationis habet; recordatis tamen virorum quot legiones, feminarum numerus quantulus pro republica per tempora praeterita pugnarint, illos harum et totius civitatis contra hostes externos custodes atque conservatores recte existimari apparet. Quae cum ita sint, neque Platonis institutum accipio, neque tibi, qui civium jus sed non officium impertire vis, assentior.

Tum Laelius: At non modo mulieres, quod ad militiam, quam ceteris civium muneribus anteponis, parum robustae sint, a suffragiis prohibere tuo quidem arbitratu oportet, sed etiam virorum quicumque vel morbo affecti vel per insitam quandam virium inopiam stipendia mereri nequeunt.

Minime vero, inquit Africanus; nam non de singulis sed de universo utroque genere nunc disputamus, neque virium varietate sed sexus discrimine genera hominum in hac quaestione discernenda sunt. Itaque nullo modo, etsi mulieres quaedam armorum avidae et capaces reperiuntur, iis suffragia concedenda esse existimo, neque viris quos memorasti adimenda. At si forte cum Ennio ideo lamentatus, quod

Spernitur orator bonus, horridu' miles amatur,
cum corpore imbecillo mentis et prudentiae copiam vis compensare, et feminas ut manu ita consilio non posse reipublicae subvenire, et Platonem, qui ne ob eam quidem causam illas e primo ordine suae civitatis rejecerit, magno in errore versari, statim mihi docere opus est. Primum igitur, ne forte contra Platonem neminem pari auctoritate praeditum a nobis stare putes, Aristotelis sententiam et acutum et moderatam proferam, quae mihi paucis verbis caput et summam altercationis nostrae comprehendere videtur. At cuiusmodi sit divinare potes?

Expone tu, inquit; non enim novi.

Tum Scipio: Modice profecto et prudenter Aristoteles muliebrem mentem non totam consilii et rationis expertem

neque mentis
i opulentiam
a iis compertis
libet,

esse sed saepissime labare et approbationis alienae praeter modum indigere duxit. Quamobrem, quia in virtutem plenam et cumulatam aspirare non possent, viris dicto audientes eas esse jussit. Consentit autem illi antiquorum acumen fere omnium, quoniam non modo Graeci sed etiam majores nostri, homines non tam in philosophia quam in rebus versati, mulieres propter consilii infirmitatem in tutorum potestate manere voluerunt. Mirum et singulare pondus debet habere antiquitas, neque instituta tot saeculorum consuetudine quasi consecrata et stabilita sine testimonio quam gravissimo temere conturbanda sunt. Atqui in eorum numero prope infinito, qui toto terrarum orbe sub populi hujus dicionem et imperium redacto nomen Romanum pro sua quisque parte prope caelo ipsi exaequaverunt, ecquae invenitur mulier? Nonnullas fortasse dices, quarum facta brevi et inopinato splendore insignia eminent: certe ne una quidem longum temporis spatium assidua cura et diligentia reipublicae gubernacula tractavit. Non deficit illis in patriam benevolentia, animi celeritas, mens in parvis callida et astuta; abest autem ea ingeni magnitudo, in rebus desperatis pertinax et constans, in prosperis sollicita, neque temporis neque fortunae moris obnoxia, omnium opportunitatum utilitatumque e longo provida, qua demum res summae ad bonum eventum procedere possunt. Haud dubium est quin feminae alterius dolorem, laetitiam, iracundiam, sollicitudinem, omnes denique animi motus, quamvis vix minimum temporis punctum in eadem specie manere soleant, incredibili quadam subtilitate percipiant; quae in omni quidem domestica familiaritate et consuetudine grati jucundique plurimum praestat, sed, origine potius e sensu quasi innato quam e ratione ducta, ad reipublicae tempora conversionesque moderandas male accommodata videtur. Subita et repentina feminarum studia sunt; quem vident, statim aut amant aut oderunt; et quoniam veri umbra et imagine, verbo fortuito, uno etiam aspectu saepissime capiuntur, faurices bonae, sed quam pravissimae iudices et existimatores indolis alienae fiunt. Quid? num in comitia, imperii quasi fontem et sedem intimam, ejusmodi cives vis immittere, quae in

τὸ δὲ ὅταν
ἔχει μὴν (τὸ
βουλευμένη)
ἅλλ' ἄερον.
Aristot. Pol. I.
13.

candidatis deligendis potius vultus atque formae indicibus quam meritis et auctoritati obsecuturæ sint? Hoc si tibi nostra in civitate efficere licuerit, populus ille, cui prope ab urbe condita bono et honori est de suo cursu neque rebus adversis dejecto neque quasi auris secundis illecto propo-
sita peragere, feminarum frequentia exsanguis et enervatus prisca constantiae firmamenta nimium facile amittet; graviter et summa cura decreta temere et inconsulto rescindet; rumoris vento unicuique cedit; sicut Graeculorum hominum coetus a re infecta semper ad alia incepta volitare assuetos videmus, ita insatiabili rerum novarum et inauditarum cupiditate accensus mera turba tandem fiet, stultitiae parens et procreator. Futilis enim et inrita feminarum voluntas: quam si quis blanditiis et adsentando frustrari, donis lucrique spe ad scelera invitare cupit, aditus sescenti in ipsa mente muliebri patent. Quis non a puero solet famosa illa Eriphylæ flagitia audire, quæ monili delusa aureo viri sui et exercitus salutem prodidit? Nonne nobis pæne in oculorum conspectu stat rupes illa nocentibus invisæ, cui Tarpeia insano præmii amore inflammata nomen omnibus execratum et detestabile dedit? Superstitionem autem, quam anilem præcipue appellare solemus, totius feminarum generis vitium commune et penitus insitum esse credo.

Quodsi in iis civitatibus, quæ quondam apud ceteros homines ex opibus et imperio in clades interitumque inciderunt, malorum causas exquisiveris, hæc eadem quæ mulieribus jam imputaverim, in mente plebis prius aperta et simplici orta paulatim ita percubuisse intelleges ut neque legum præsidio neque optimatum prudentia res conservari possent. Nihil enim plus incommodi et calamitatis reipublicæ afferre solet quam mens præceptis et temporis futuri improvida, superstitio, inconstantia, desidia, falsæ et incertæ opiniones in civium mentibus insitæ. Quæ cum in ingenio muliebri sæpius, ut dixi, quam in virili ingravescant, plebem et contiones, quæ a tali vitiorum genere jam parum aliena esse videntur, non solum illarum vitii sed ipsis inmissis tanquam bis effeminare cupis?

At fortasse et consilio, sicut antea de corporis viribus

contendisti, multos viros omnino carere respondebis; utrum ad res deliberandas plus valeat et proficiat ea cui litteris, virtute, genere a stirpe nobili et antiqua ducto nemo fere præstet, an colonorum rude et rusticum ingenium, qui tamen jure suffragii sint potiti, rogabis. Dico, quod antea dixi, non nos in hac quaestione de singulis disputare: nego quoque mulierem, quia artibus sit eruditior, humanitate politior, genere insignior, ideo et reipublicæ plus prodesse quam rusticum: illa enim lepore suo nos delectat, ille prudentia confirmat. Quæ cum ita sint, quid ego plura de hoc dicam?

Comparatis igitur et dijudicatis virorum atque feminarum corporibus et mentibus, propter duas causas, quas exposui, a te et a Platone dissentio; quæ cum ad hanc quaestionem magnum momentum habere debeant, duplici documentorum arte tanquam ex utraque parte circumsessus tandem de sententia decedis, an etiam alia scrutari et aperire mihi opus est? Jam vero in ista sententia mihi vacillare videris; sed quoniam multa sunt ea quæ nondum a nobis audivisti, pauca quidem, nisi pertaesum esse, breviter perstringam.

Acuta profecto, inquit Laelius, et veri simillima de consilio muliebri protulisti; uberius tamen quod in principio pollicitus es, velim perficias.

Tum Scipio: Videtur igitur feminarum indoles, quam ad rem gerendam vel militarem vel forensem haud sine causa contemptui habetur, tamen in virtutis genere intimo quodam et domestico admodum excellere et præstare. Nam quis non mores suos, quacumque in opera ætatis ac laboris partem plurimum insumit, ad exempla studiis illis et officiis cottidianis commoda et opportuna conformat? Ita fit ut mulieres, quod quasi in asylo vel portu ab externis procellis et molestiis vacuo ad rationem vitæ degendæ quietam et tranquillitatis plenissimam omne tempus ætatis suæ adhaerescunt, ejusmodi laudes appetant quæ cum tali usu et consuetudine consentiant, neque sit quod vehementius cupiant quam hominum fama et sermone castæ, modestæ, frugi, mites audire. Accedat etiam animus diligens et muneris domestici peritus, lingua jurgiorum

Floret in rebus domesticis virtus mulieribus, in republica comminuitur.

expers, liberorum cura, viri observantia; nihil invenio quod tot virtutibus addendum est. Tales erant nostris majoribus uxores, quae splendidissima priscae virtutis exempla Catonem, Fabricium, Regulum, alios permultos reipublicae salutis generatos educaverunt. Sed haec omnia, quae laudavi, quanquam domi ab amicis et propinquis caritatem, gratiam, amorem quam maxime conciliant, foris iniquo contionum tumultu ac perturbationibus obscurata nihil honoris neque commendationis comparare possunt. Ego scilicet nullo modo, si quis eorum qui in republica versantur modestum, verborum parcum, inimicis lenem se praebere potest, eum in culpa pono: immo vero miror; non tamen tali ingenio praeditum ad summos honores perventurum esse arbitror. Nam qui sibi consulunt, blanditiis et loquacitate aures populi captare, merita sua impudenter divulgare, favoris aucupandi causa nihil non audere necesse est; qui reipublicae prodesse student, iis alacritate quadam et incitatione animi opus est, quae longe a muliebri tranquillitate discrepant.

Nimirum cives istae feminae ad causas perorandas ingressae non, ut antea, silentio, quod a poetis decus insigne mulierum existimant, sed potius, sicut Cetheus ille, qui apud Ennium

"Flos delibatus populi, suadaeque medulla,"

celebratur, verborum splendore copiae commendabuntur; nonne vereris ne balbutiant, erubescant, explodantur? Non verecundiae parsimoniaeque causa, si forte candidatae honores a populo petiverint, latere decebit, sed precibus, ambitione, muneribus, assiduitate in omnium ore atque oculis versari atque florere: magistratus denique, leges, judicia, nisi animis praeditae domestica re et sollicitudine vacuis quomodo recte administrare poterunt? Suffragiis tamen acceptis, haec cetera civium munera detrectare nequibunt.

At non modo virtutes, quas paulo ante enumeravi, e loco tuto et umbratili evolsae tanquam flosculi languescunt, sed etiam feminarum vitia, quae ne domi quidem culpam vitare solent, in medium translata multo uberius crescunt et abundant. Quae cum supra fere omnia commemoraverim, haec duo sola praeterea mihi in mentem veniunt;

quae, tametsi nunc parva sunt neque nisi perraro in reipublicae consilia permanent, tum vero, cum feminis respublica communis facta sit, gravia et calamitosa fore credo. Feminarum enim plerisque mens fucosa quaedam et artificis erudita est; quod intimo pectore sentiunt, vultu saepe dissimulant: et quoniam vi et armis injurias ulcisci non possunt, eo studiosius per fraudem atque insidias ad inimicos opprimendos occasionem aucupantur. Haud dubium autem quin cum ex utroque sexu quidam sint invidi, lividi, malevoli, tum illae sese et ad ejusmodi odia procliviores et in iis saturandis acerbiores praebant. Nonne inter omnes constat nihil omnino esse tam dirum, nihil tam funestum, quam feminarum dolum cum odio sociatum? Haec vero vitae privatae et quietae vinculis quasi inclusa et astricta nihil grave neque capitale reipublicae afferre possunt; solutis vereor ne totius civitatis exitium inde eveniat: nam persaepe quod privato homines ignoscunt, civi non est concedendum.

Itaque cum mulieres tanta virtute quanta maxima iis esse potest intra Larum tutelam abundare videantur, sed foris quasi impetu novo et acerrimo incitatae citius in pravitatem declinent, feminae esse opinor domus familiarumque curam exercere, viri militis oratorisque laudes sibi consequi. Legem autem et institutum in ipsa rerum natura insitum ac stabilitum discrimen illud oportet existimare; quod ad confirmandum non modo consilii corporis dissimilitudo, sed alia multa in utroque sexu diversa exstant, quorum partem memoravi, numerum totum enarrare longum est. Ex his apparet mulieres ingenio quod explicaverim praeditas neque ceteris civium officiis neque jure suffragii, quod imperii maximam partem in se contineat, recte perfungi posse.

Qui igitur viros ad rempublicam gerendam aptiores esse negant, redargui: sed cum quibusdam alia controversia mihi restat affirmantibus post hominum genus exortum natura feminas in omni arte et opera nullo modo deteriores esse sed viris etiam praestare; una tamen re a viris superatas ob eam tam levem causam malorum scilicet multitudinem prope infinitam accepisse: nam quippe quae partus

Feminarum igitur ingenium non ad rempublicam aptum est.

Sunt qui feminas per disciplinam virili indole imbueri cupiant.

causa corporis habitu multo teneriore quam viri utantur, forensi et militari munere ab illis occupato ipsas e republica exclusas ad vivendi cursum humilem et obscurum paulatim coactas esse. Itaque propter corporis imbecillitatem virorum potestati subjectas servitutum turpissimam et injustissimam ex omni saeculorum memoria perpeti; qua demum animos muliebres, haud minus quondam in rebus externis quam in domesticis laudandos, tandem ita debilitatos esse ut, perinde ac captivi spe libertatis adempta cum vinculis et mores servorum induere soleant, ita feminis prisca fortitudine privatis virtus quaedam manca et servilis sola relicta sit. More igitur usuque pravo et praepostero, sed non natura, plus momenti viris quam feminis in republica reddi, neque his illos esse praeferendos, nisi eo quidem quo indoles acrior prius ac perfectior consulto et cogitata injuria a viris aliqua ex parte corrupta sit. Talem denique causam quidam sibi finxere quare homines utriusque sexus studia sua atque propria sint complexi: verumtamen quod virorum voluntate et consuetudine inveterata effectum sit doctrina praeceptisque commutari posse dicunt: ex quo apparet mulieres vitiiis suis quippe quae non sint naturalia per disciplinam castigatis ingenium id virile solidumque, cuius olim cum viris participes essent, mox ita redintegraturas esse ut in civium numerum brevi post tempore redire possint. Nonne quae asseverant nonnulli sine fallaciis enarravi?

Tum Laelius: Mihi ita videtur.

Sed qui haec dicunt, inquit Scipio, vana mihi loqui videntur, neque mores muliebres per consuetudinem virorumque dominatum degenerasse arbitror, sed potius natura ita constitutos esse. Concedatur tamen hoc ipsum, eos non insitos esse, sed facile emendari corrigique posse; abrogatur lex illa, nullis litteris mandata, sed omnium gentium sapientia, omnium praetitorum memoria corroborata, quae homines utriusque sexus sua vitae ratione contentos alteram detrectare jubet; finge, precor, animo tuo mulieres per disciplinam confirmatas non diutius virorum delicias, conjuges, adiutrices esse, sed cum iis de laudibus contendere, in republica praestare, animis e servitute diuturna expeditis

civile pondus et auctoritatem sibi comparare. Quam conditionem si pro feminis vis vindicare, nonne ad eam exorandam multa dictu speciosa prompta et parata sunt? non quasi aperto in conspectu vincula tum demum videbimus exuta, feminas tandem virtutis plenae ac perfectae factas compotes, cum disciplina talis erit instituta? non civitatem tanquam novo sanguine in venas infuso refectam, novis artibus et humanitate florentem, novi generis laudes sibi exquirentem? Tum denique scilicet tota feminarum natio e rebus mediocribus curisque levibus erepta semper in meliora aspirabit; e timida fortis, magnanima, honorum cupida fiet, e caeca et inconsulta prudens rerumque futurarum provida, e lubrica et incerta stabilis et constans. Haec mihi quidem vix philosophorum judicia, sed potius delirantium somnia videntur: libenter tamen concedantur. At certe, etsi ex ea disciplina, quam ad priscam virtutem feminarum renovandam quidam usurpare cupiunt, forsitan aliquid boni muliebri ingenio afferatur, detrimenta quanta in e tanta rerum conversione nostra civitas captura est. Nam simul atque feminae inusitata quadam communione speciem et exemplar quae in viris laudantur mentibus suis impresserint, quem non pestis atque perniciem rei domesticae urgebit? Deerit reipublicae proles hominum futurorum, neque si qui forte erunt procreati, pristina diligentia materna curabuntur; sterile enim et asperum genus mulierum credo fore, quae neglectis liberorum spe et amore se totas in res externas ac forenses dederint. Quamobrem per istam feminarum liberationem respublica potius civibus expectatis fraudabitur quam ex mulieribus turba addita novas vires sibi consequetur. Constat autem inter omnes nullos in hostibus arcendis esse vehementiores, nullos in reipublicae desperatis temporibus fideiores, quam qui pro domo sua liberisque pugnent consulantque; quod ad labores et pericula sustinenda magno esse stimulo et incitamento. Hoc bene notum habuit Leonidas ille, vir non modo fortis sed ut ex eventu liquet consilio praeclarissimo praeditus, qui pro patria moriturus gloriaeque sempiternae cupidus ab Herodoto traditur contra morem Lacedaemoniorum trecentos patresfamilias Thermopylarum custodes sibi ad-

At nihil emolumenti respublica inde capiet.

junxisse. Languescet igitur civium fortitudo nullis studiis domesticis accensa, neque pro iis pericula libenter subibunt a quibus pari cum sua dignitate praeditis nihil observantiae expectarint.

At non modo viri fortes patriaeque studiosi deficient, sed etiam, feminis virili ingenio quasi veste fucata quadam indutis, multa peribunt quae nunc homines a ceteris animantium generibus quam maxime separant. Quis in animo muliebri tenerum quiddam atque molle non summo desiderio ademptum requiret? Quis dubitat quin sicut picturam e multis coloribus bene temperatam potius laudare soleamus quam eam quae spectantium oculis unum tantum praebeat, ita cum sit asperior virorum natura, tenerior feminarum, communitate familiari inter se commixtae meliores fiant ambae? Sic enim illa humanitate mitigatur, haec nervis viribusque confirmatur: quarum si altera erit extirpata, altera sola relicta, genus humanum aut nimis molle delicatumque, aut per feritatem bestiis consimile fiet. Conjugis autem purus et honestus amor, quo nihil reipublicae plus prodesse potest, foci caerimoniae, Penatum cultus religioque evanescent; neque vir ab uxore dolorum solacia laborumque hortationem impetabit, neque uxorem viri manus consiliumque tuebuntur: servile nuptiarum jugum nisi brevissimum tempus nullae feminae cervicibus accipient. Societate denique cives non diutius domestica sed solutiore quadam et incertissima inter se utuntur. Quae cum ita sint, respublica videlicet, si feminis virilis disciplina erit instituta, tot tantisque morbis affecta haud longo post tempore occidet.

Platonem vero scio neque familias neque rem privatam civibus suis permisisse; quippe qui illos animis ab omni sollicitudine domestica liberatis ad rempublicam bene gerendam aptiores fore putarit. At pro ea republica homines se devovere cupient in qua ne liberos quidem suos sibi vindicare liceat? Comminet igitur ista feminarum libertas reipublicae nervos, nihil suave in vita hominum tolerabit, parum boni feminis ipsis asferet. Ex quo nonne perspicuum est neque sexus discrimina conturbare oportere neque ingenium muliebre ad munera publica gerenda aptum esse?

Tum Laelius: Ita prorsus existimo

Sequitur deinde, inquit Scipio, suffragia iis non esse concedenda. Sed pro epilogo ne quid praetermissum aut infectum putes, bene illo Graecorum proverbio praecipitur, *Epilogus*. quod ex Aristophane contra eos qui spretis praeteritorum sapientia ipsiusque naturae auctoritate omne sexus discrimen oderunt haud inepte proferri potest:

Quam quisque norit artem, in hac se exerceat.

Primum igitur feminas admoneo id quod mihi optimum esse videtur, ne stulta suffragiorum cupiditate captae onera et molestias ultro sibi deposcant, sed potius ut civitatis gubernacula virorum probitati, fidei, felicitati permittant, quae multis terroribus depulsis illam huic aetati et incolumem et summa laude imperioque insignem tradiderint: sin autem aliquid momenti in consiliis habere gestiunt, privatim virorum animos ad ea quae volunt blanditiis et arte muliebri advertant; habet enim persaepe ex usu familiari originem id quod publice factum auctorem suum omni commendatione illustrat. Sanctum denique et inviolatum hominum universorum morem, quo inter virorum mulierumque studia rationesque vitae degendae magnum discrimen et intervallum interjectum est, nos haud minus quam majores nostros custodire oportet. Quod nisi neglexerimus, neque illae de ingenio suo degenerabunt, neque respublica, et virorum et feminarum pari concordia quasi duobus certissimis fulta firmamenti laudes saeculi superioris virtute comparatas prodet, sed tempus in aeternum conservabit.

MSH 307.9

**END OF
TITLE**